



Deliberaziun dal preventiv 2019 a man da la RC dals 30 november 2018

La suprastanza cumünala ha surlavurà il preventiv dal quint da success e dal quint d'investiziun per l'on da gestiun 2019 ed approvà tals a man da la radunanza cumünala chi ha lö la fin november.

Sanaziun Implant da tir Arduond, Zernez - surdatta da lavurs

L'incumbenza per sanar l'implant da tir in Arduond a Zernez es gnüda surdatta a la firma Bagger Cello GmbH a Zernez.

Stabilimaint da gestiun in Cul – dumonda da princip per tachar vi dal provedimaint central da chalur

Cuntschaintamaing vain restructurà üna part dal stabilimaint 40H in Cul in localitats pels pumpiers Zernez. In quist connex ha la suprastanza approvà la dumonda da princip da tachar l'edifizi vi dal provedimaint central da chalur in Cul.

Suost pels scolars a Lavin – dumonda da princip

La suprastanza ha trattà la dumonda per eriger ün suost pels scolars per spettar sül bus da scuola. Il suost dess gnir realisà pro la butia dal Volg a Lavin. L'inizi dal proget es gnü sancziunà.

Cumün da Zernez – novas resp. spostamaints da staziuns da transfuormaziun

Il Cumün da Zernez prevezza dad eriger novas staziuns da transfuormaziun sco eir da spostar da quellas existentas sün diversas parcelas dal territori da la fracziun da Zernez. La posiziun a man da l'ESTI es gnüda sancziunada da la suprastanza cumünala.

Sanaziun viaduct Val Tuoi Lavin-Giorsun

Tenor üna comunicaziun da la Viafier Retica vain il viaduct Val Tuoi sanà l'on chi vain. La suprastanza ha approvà la procedura simpla dal plan da la Viafier Retica.

Protecziun da las auas - publicaziun da planisaziun e d'intervenziun

La mità gün 2018 es entrà il rapport da preexaminaziun dals uffizis chantunals. Il büro da planisaziun Stauffer & Studach a Cuaira ha redigi fin la fin d'avuost üna survista da pendenzas cun adattamaints previs. Ils puncts manzunats sun gnüts trattats. La suprastanza ha sancziunà la versiun per la publicaziun da planisaziun e d'intervenziun a man da la radunanza cumünala dal schner 2019. La suprastanza giavüscha a la populaziun da s'infuormar sur la chaista naira digitala o sülla homepage dal Cumün da Zernez sur da quist proget da planisaziun.

Ledscha cumünala da seguondas abitaziuns - publicaziun da planisaziun e d'intervenziun

Il rapport da preexaminaziun dals uffizis chantunals es entrà la mità gün 2018. La suprastanza ha trattà e sancziunà la versiun per la publicaziun da planisaziun e d'intervenziun a man da la radunanza dal schner 2019. La suprastanza giavüscha a la populaziun da s'infuormar sur la chaista naira digitala o sülla homepage dal Cumün da Zernez sur da la ledscha cumünala da seguondas abitaziun ed inventar d'edifizis characteristics pel purtret dal cumün.

EW Zernez - adattamaint taxa fundamentala e taxa da transport tenor EICom

Il Cumün da Zernez respectiv l'EW Zernez sto adattar per cumanzamaint october 2018 la facturaziun da parts da la forz'electricca per gnir davo a dovairs legals da l'EICom. Pro quist adattamaint as tratta d'ün adattamaint da güstia invers tuot ils consüments. Ils adattamaints sun gnüts approvats.

Società anonima MENSA

Il Cumün da Zernez es tras l'EE-Energia Engiadina fingià acziunari da la MENSA (Mia Engiadina Network SA) per las fracziuns da Susch e Lavin. Illa fracziun da Zernez invezza fabrica sü l'EW Zernez la rait da fibr'optica. La suprastanza ha sancziunà la partecipaziun a la società anonima e la cumpra d'acziuns ed implü cun ün credit sainza fit per la dürada da tschinch ons. Ultra da quai ha la suprastanza decis da propuoner a Corsin Scandella, sco commember da la direcziun operativa e manader da l'EW Zernez, sco rapreschantant dal Cumün da Zernez i' l' cussagl administrativ da la MENSA.

Proget da sanaziun ed ingrondimaint da la chasa da scuola a Zernez – cumischiun da fabrica

Per pudair proseguir culla lavur da detagl d'ürant la fasa da proget da la sanaziun e da l'ingrondimaint da la chasa da scuola a Zernez as voul s-chaffir üna nouva cumischiun da fabrica e schoglier la cumischiun actuala chi's vaiva ingaschada pel proget fin pro la decisiun tras la radunanza cumünala. La suprastanza ha elet fin uossa be ils rapreschantants davart dal cumün. Duos fin trais rapreschantants dessan però esser persunas da la populaziun. Persunas chi volan s'ingaschar per quist proget sun dumandadas d'annunzchar lur interess in scrit fin als 2-11-2018 a la chanzlia cumünala.

Planisaziun da quartier Heinrich-Filli - decretaziun finala

La suprastanza ha sancziunà la decretaziun finala dals cuosts da procedura da la planisaziun da quartier Heinrich-Filli.

Pè d'impostas cumünalas per l'on 2019

Per l'on 2019 voul la suprastanza cumünala propuoner a la radunanza cumünala dals 30 november 2018 da laschar il pè d'impostas sün 84% da l'imposta chantunala simpla.

Garanzia da deficit per La Diagonela 2019

La suprastanza ha acconsenti a la dumonda dal comité d'organisaziun per üna garanzia da deficit per La Diagonela 2019. La cuorsa da passlung ha lö als 19 schner 2019 i'ls contuorns da Zuoz.

Collavuraziun turistica TESSVM

A partir dals 1. december 2018 surpiglia la TESSVM il marketing turistic dal Cumün da Zernez e la direcziun dal post d'infuormaziun a Zernez. La suprastanza cumünala ha approva la cumpra d'aczias, ils statüts, il contrat da destinaziun ed il reglamaint d'organisaziun da la TESSVM.

Termins 2019

L'agenda da termins pel 2019 es cuntshainta e gnüda sancziunada. Dürant il 2019 as fa quint cun tschinch radunanzas cumünalas, 17 sezzüdas da la suprastanza cumünala e cun 25 sezzüdas da la direcziun operativa. Implü sun gnüts fixats ils termins dals tavulins.

Büro electoral dals 25 november 2018

La suprastanza ha elet il büro electoral per las votaziuns e reelecziuns/elecziuns cumünalas dals 25 november 2018. Al büro electoral fan part: Emil Müller sco president, Seraina Bickel, Martina Peretti, Fadri Guler e Corsin Scandella sco actuar.